

16.08.2025

आकाशवाणी जयपुर—अजमेर
प्रादेशिक समाचार

1850 बजे

- प्रधानमंत्री नरेन्द्र मोदी काल नई दिल्ली मांय करीब 11 हजार करोड़ रिप्यां री दो राष्ट्रीय राजमार्ग परियोजनावां री सरुआत करेला।
- देशभर रा एक हजार एक सौ पचास टोल प्लाजा माथे फास्टैग वार्षिक पास सुविधा सरु।
- प्रदेश मांय पटवार भर्ती परीक्षा काल—राजस्थान कर्मचारी चयन बोर्ड नकल रोकबा खातर पुख्ता इन्तजाम कर्यो।
- श्रीकृष्ण जन्माष्टमी रे मौके राज्य मांय सिरधा अर भवित अर माहौल।
- प्रदेश मांय आवता तीन—चार दिन बारिश रो दौर जारी रह सके है।

000

प्रधानमंत्री नरेन्द्र मोदी काल नई दिल्ली मांय करीब 11 हजार करोड़ रिप्यां री दो बड़ी राष्ट्रीय राजमार्ग परियोजनावां री सरुआत करेला। इण परियोजनावां मांय द्वारका एक्सप्रेस—वे रा दिल्ली खण्ड अर शहरी विस्तार सड़क रो दूजो भाग भेल्लो है। प्रधानमंत्री कार्यालय एक बयान मांय कहयो के ये परियोजनावां यातायात सुगमता खातर विकसित करी गयी है। इण सूं राजधानी अर आरे—सारे रा हलका ने ट्रेफिक जाम सूं छुटकारो मिल सकेला। इण मौके प्रधानमंत्री एक जनसभा ने भी सम्बोधित करेला।

000

भारतीय राष्ट्रीय राजमार्ग प्राधिकरण आज सूं पूरा देश मांय करीब एक हजार 150 टोल प्लाजा माथे 'फास्टैग वार्षिक पास' री सुविधा सरु कर दी है। सड़क परिवहन अर राजमार्ग मंत्रालय रे मुजब, काल करीब डेढ लाख लोग वार्षिक पास खरीद्या।

000

पैली रा प्रधानमंत्री अटल बिहारी वाजपेयी री पुण्यतिथि माथे समूचो राष्ट्र वां ने सिरधाजली दे रहयो है। राष्ट्रपति दौपदी मुर्मू, प्रधानमंत्री नरेन्द्र मोदी, लोकसभा अध्यक्ष ओम बिरला नई दिल्ली स्थित श्री वाजपेयी री समाधि सदैव अटल माथे फूल चढ़ाया। मुख्यमंत्री भजनलाल शर्मा आप रा रहवास माथे श्री वाजपेयी ने फूल चढ़ा र सिरधांजली दी। श्री शर्मा वां ने दूरदर्शी नेता अर ओजस्वी वक्ता बताया। वण कहया के राजनीति मांय शुचिता अर उच्च आर्दशां रा प्रतीक श्री वाजपेयी ने हमेशा याद कर्यो जावेला।

000

राष्ट्रपति दौपदी मुर्मू आज राष्ट्रपति संपदा मांय प्लुमेरिया गार्डन, बनयान ग्रोव अर बबलिंग बुक रो उद्घाटन कर्यो। सोशल मीडिया पोस्ट मांय राष्ट्रपति कह्या के ये अबै अमृत उद्यान रो हिस्सो है। प्लुमेरिया गार्डन मांय घास रा टीला है, जद के बेनियन ग्रोव मांय रिफ्लेक्सोलॉजी पथ, पंचतत्व ट्रैल्स दिखायी हैं। बबलिंग बुक मांय झरना अर सीढ़ीनुमा पत्थर है। अमृत उद्यान आवता म्हीना री 14 तारीख तांई जनता खातर खुल्यो रेवेला।

000

विधानसभा अध्यक्ष वासुदेव देवनानी सूं आज उत्तर प्रदेश रा विधानसभा अध्यक्ष सतीश महाना जयपुर मांय मुलाकात कीनी। विधानसभा मांय व्ही इण मुलाकात मांय दोन्हू रे बीच विधायी कार्यप्रणाली, चुनौतियां, नवाचारां अर लोकतात्रिक परम्परावां माथे चर्चा व्ही। इण दौरान श्री देवनानी वां ने राजस्थान विधानसभा री ऑनलाइन पेपरलेस प्रक्रिया रा बारा मांय बताया श्री महाना राजस्थान विधानसभा रा नवाचार अर भवन री अणूठी स्थापत्य कला री सराहवणा करी।

000

ऑपरेशन सिंदूर मांय अदम्य साहस अर वीरता रो परिचय देबा वालां वायु सेना रा ग्रुप कैप्टन अनिमेष पाटनी ने केन्द्र सरकार री कानी ऊं वीर चक्र सूं सम्मानित कर्यो जावेला। यो सम्मान राष्ट्रपति दौपदी मुर्मू कानी ऊं राष्ट्रपति भवन मांय राख्या समारोह मांय दियो जावेला। वायु

सेना रा 9 अहलकारां ने वीर चक सूं नवाज्यो जावेला। कैप्टन पाटनी मूल रूप सूं बारां ज़िला रा कुजेंड गांव रा रहवासी है। इण खबर सूं पूरा ज़िला मांय खुशी अर गौरव रो माहौल है।

000

राजस्थान कर्मचारी चयन बोर्ड री कानी ऊं काल पटवार भर्ती परीक्षा राख्यी जावेला। 3 हजार 705 पदां खातर या परीक्षा 2 पारियां मांय ली जावेला। बोर्ड अध्यक्ष आलोक राज बताया के इण खातर पौने सात लाख सूं बत्ता अभ्यार्थी आवेदन कर्यो है। श्री राज बताया के परीक्षा रे दौरान नकल रोकबा खातर सी.सी.टी.वी. कैमरां सूं निगरानी राखी जावेला। वठिने परीक्षा केन्द्र मांय दाखिला रे दौरान अभ्यर्थियां री फेस स्केनिंग अर बायो मैट्रिक उपस्थिति व्हेला।

000

उदयपुर रा कोटड़ा हलका रा पाथरपाड़ी गांव रा पीएमश्री राजकीय उच्च प्राथमिक विद्यालय मांय व्हया हादसा री उच्च स्तर री जांच करी जा री है। कार्यवाहक सहायक अभियन्ता अर संविदा माथे काम कर रिया सिविल कन्सलटेंट ने तुरत प्रभाव सूं निलम्बित कर दियो गयो है। इण रे सागे ई शिक्षा विभाग री कानी ऊं संवेदक फर्म रे खिलाफ़ एफ.आई.आर. दरज कराबा रा निर्देश दिया गया है। घटना मांय वठे बण रह्या स्कूल रो छज्जो गिरबा सूं उण रे कने सूं गुजर री एक टाबरी री मौत व्हे ग्यी अर दूजी घायल व्हे ग्यी।

000

प्रदेशभर मांय सिरधा अर भक्ति रे सागे श्रीकृष्ण जन्माष्टमी रो पर्व मनायो जा रह्यो है। इण मौके मिन्दरां मांय खास श्रृंगार कर्यो गयो है। इण मौके ज्ञाकी, रासलीला, दही हांडी, नृत्य संगीत अर भजन संध्यावां सूं माहौल भक्तिमय व्हे रह्यो है। जयपुर रा श्री गोविन्ददेव जी मिन्दर मांय जयकारां अर कीर्तन रे सागे जन्मोत्सव मनायो जा रह्यो है। सीकर मांय खाटूश्यामजी, करौली रा मदन मोहन, उदयपुर रा जगदीश मिन्दर अर अलवर रा रंगजी मिन्दर मांय भी सिराधालूआं रो जमावड़ो निजर आ रह्यो है। चित्तौड़गढ़ रा श्री सांवलिया सेठ कृष्णधाम ने फूलां अर रंग-बिरंगी रोशनी सूं सजायो गयो है। म्हाका खबरनवीस बताया के प्रदेश रे सागे ही दूजां राज्यां सूं भी बड़ी तादादा मांय श्रिरधालू दर्शन खातर पूग रह्या है।

000

बालोतरा अर सिरोही रा पिण्डवाड़ा अर रोहिड़ा समेत केई दूजी ठौड़ां माथे जन्माष्टमी रे मौके महिलावां परम्परागत रूप ऊं तलाब पूजन कर्यो। चूरू रा प्राचीन कृष्ण मिन्दर मांय मेळो राख्यो गयो है। वठिने नाथद्वारा रा श्रीनाथ जी मिन्दर मांय भी धूमधाम सूं जन्माष्टमी रो उत्सव मनायो जा रियो है। इण मौके शोभायात्रा भी काढी जा री है। रात 12 बज्यां श्रीकृष्ण प्राक्ट्य रे सागे जन्माष्टमी रो पर्व मनायो जावेला।

000

प्रदेशभर मांय आवता तीन-चार दिन बारिश रो दौर जारी रह सके है। मौसम विभाग आज चौबीस ज़िलां मांय बिरखा रो यलो अलर्ट बतायो है। वठिने 18 अगस्त ने उदयपुर अर सिरोही रा कुछ एक हलकां मांय छितरायी तो कठे-कठे भारी मेह बरस सके है। राजधानी जयपुर, सिरोही अर पाली मांय भी दोपहर पाछे बारिश रो दौर चाल्यो।

बाड़मेर सूं म्हाका खबरनवीस बताया के चौखो मेह बरस्बा सूं लोगां ने गर्मी सूं राहत मिली है। काल अठे बत्तो तापमान 40 डिग्री सेल्सियस रे पार दर्ज कर्यो ग्यो।

इण बीच लारला चौबीस घंटां मांय उदयपुर रा गोगुन्दा मांय सब ऊं बत्तो 7 सेंटीमीटर मेह बरस्सो। भरतपुर रा पहाड़ी, झालावाड़ रा गंगधार, राजसमंद रा नाथद्वारा, कुम्भलगढ़ अर कोटा रा सांगोद मांय भी मूसलाधार मेह बरस्यो। जालौर मांय भी तड़के रुक-रुक र तेज़ बारिश व्ही। वठिने बाड़मेर, जोधपुर, जालौर, बांसवाड़ा, झालावाड़, बारां, झूंगरपुर मांय भी कुछ एक ठौड़ां माथे 2 सूं 4 सेंटीमीटर बरसात दर्ज व्ही। वठिने सिरोही रा माउंटआबू मांय भी सैलाणियां री भारी भीड़ है। इण ने देखता थका प्रशासन आबू रोड माउंट आबू जाबा वाली बड़ी अर भारी गाड़ियां माथे 20 अगस्त ताँई रोक लगा दी है।

000